

پیلکی مجموعہ سی

کانون اول، ۱۳۲۹

صای ۲

پیل ۱ - جلد ۱

سپٹیمک تاریخی صفحہ لری وقت باسقی مکتبہ کورہ حال حاضری

انسانلرک اجتماعی فعالیتلری تدقیق ایدیلنجہ باشلیجہ ایکی نوع حیاتک موجودیتی مشاهدہ اولونور :

برقسم فعالیتلر اولدن ترتیب وتنظیم اولونمش برپلان و پروگرامک خطلری اوزرنده جریان ایتدیریلیر ؛ بونلر مطلق صورتده مؤثر و وحدتله متصف بر اراده نك تعیین وسوقه محتاجدرلر. دیگر قسم فعالیتلر ایسه مرتب بر پروگرامه، واحد بر اراده یه تابع ده کلددرلر. بونلردن برنجیسی جمعیتک دولتی حیاتی [La vie étatique] ، ایکنجیسی ده عمومی حیاتی [La vie publique] تشکیل ایدر .

فعلیاتده شو ایکی نوع حیات بینی تفریق ایتمک پک مشکدر. ذاتاً اجتماعی حیاتده کی وحدتده بوکا مانعدر. بونلردن بری دیگرى اولمقسزین یاشایاماز؛ و شو ایکی حیات دائمی صورتده بربری اوزرینه تأثیر ونفوذ اجرا ایدرلر. لسان، عادات، ادبیات و صنایع نفیسه، اقتصادیات جمعیتک یکنسق براراده یه، تشکیلاتلی بر استقامته تابع اولمایان فعالیتلرندندر. تشکیلات و تنسیقاته مظهر بشری بر اراده طرفندن تعیین و تحدید ایدیلش اجتماعی وقعهلرک اک مهمی ایسه دولتدر .

جمعیت داخلنده کی حقیقی و حکمی شخصلر دولت اولمقسنزین وارلقلرینی محافظه ایدمهزلر .

دولت تشکیلاته تابع عمومی مؤسسەلرک کافه سی ایچون حیات شرطلرینی تعیین ، اولنرک حرکت حدودینی تقيید ایدمه . دیگر طرفدن دولت جمعیتک عمومی حیاته داخل اولان فعالیتلری حمایه ، بولنرک تکامللرینه مانع اولاییله جک حائللری رفع وازاله ایدمه . قلاسیق اقتصادی مکتبک سربستی نامنه یاپدیغی متعصبانه مدافعەلره رغماً بولکون اقتصادیاتده حمایه پولیتیکاسی بویوک براكثريت طرفندن قبول ایدیلش و دولتـلردن بر چوغنک حقوقی موضوعەلرینه داخل اولمشدر . ذاتاً اون دوقوزنجی عصرک صوک نصفنده وجوده کلن بویوک اقتصادی انقلاب بوحمایه و مداخله پولیتیکاسی دولت ایچون بر مجبوری وظیفه حاله کتیردی . مقتصدلرک تعبیری وجهله عمومی فعالیتلر ساحه سنده ملی اقتصاد عائله اقتصادی یرینه قائم اولمقدهدر . کوچوک عائله اقتصادی حیاتی بولکونک عظیم احتیاجلرینی تطمینه قادر ده کلدر . کنیش بر ساحه اوزرینه یاییلمش ، بوتون اراضیه داللرینی صالمش ، شعبەلر وجوده کتیرمش ، برچوق فردلرک معاوتنه محتاج اقتصادی تأسیساته لزوم واردر . شو لزوم عائله اقتصادیـنک یرینه ملی اقتصادی اقامه ایدیور . بولندن باشقا مخابرەلر ، بری و بحری مناقله ، تنویرکی احتیاجلر اولیله بویوک براهیت اکتساب ایتدیلرک بولنرک بر آن ایچون توقفی اجتماعی حیاتی بویوک بر قارغاشالغه آتابیلمک ماهیتنی حائزدر . بویله ملحوظ تشوشلردن جمعیتی محافظه ایچون دولتک مداخله سی ألزمدر . دولتک فعالیت دائرە سی مدنیتک ترقیسی ، احتیاجلرک ترایدیه وسعت بولمقدهدر . دینه بیلیرک دولت بوتون اجتماعی غایه لری نفسنده جمع و ترکیب ایدیور .

اجتماعی مؤسسەلرک تعقیب ایتدیکی تکامله بر تاریخی مراتبه تعیین ایدیلک ایستە نیلیرسه فرد ، جماعت ، دولت قدمەلرینی کولسترمک اقتضا ایدمه . دولت ، حیاتنک ایلک کولنلرنده کندینه وظیفه اولارق آنجاق خارجی مسالمتی و داخلی امنیتی طائیشدر . فقط هر کون یکی یکی غایه لر ظهور ایتمهکە باشلادی ؛ بولنر ابتدا جماعتلر طرفندن تعقیب اولوندی ؛ اجتماعی حیات ایچون لازم اولان اهمیتی

اكتساب ايدنبجه دولت خدمتلى مياننه كیرهرك بر مؤسسه حالى آلدی .
معارف بدایه خصوصى بر ایش ایدی ؛ صوکره جماعتی بر امر اولدی ؛
نهایت دولت وظیفه لرینک حتی أهملى مياننه كیردی . امور خیریه ده عینی
ماضی بی ارأه ایتکده در .

بو کون امور خیریه [Bienfaisance] و معاونت عمومیه [Assistance
publique] دولت خدمتلى مياننه کیرمک اوزره در .

اجتماعی وقعه لرك مرصده سی جمعیتده دولتی حیات [La vie étatique]
فعالیتک دائره سی کنیشه دیکنی ، عمومی حیات [La vie publique] فعالیتنه
یاواش یاواش تشکیلاتک داخل اولدیغی ارأه ایدیور . فقط تشکیلات قاعده بی ،
قاعده مؤیدی ، مؤید ایسه اجبار صلاحیتی تضمن ایدر .

شو مهم نقطه لر دقتده طوتولارق دولتی حیاتک اساسی خطلى تعیین
وارأه اولونا بیلیر .

۱ — مشترک غایه

۲ — بو غایه نک تعقیبنی انتظام و ترتیب آلتنه آلا ن قانون نامیله دستورلرك
موجودیتی [Existance des normes]

۳ — دستورلرك موضوعی : دولت و فردلرك حقوقی موقعلری ، اولنرك
حق و وظیفه لری .

۴ — فردک و یا فردلرك مقاومتنه رغماً جبرایله دستورلرك تحقق ایتدیریله سی
[La contrainte]

۵ — غایه بی تعقیب ، دستورلری تطبیق ، ایجابنده جبراجراسی ایله مکلف

عضوک [Organe] تعیینی : حکومت ، اداره [Gouvernement, administration]

کیملرك کیملر ایچون چالیشدیغنک تفریقی ، مأمورلر ، وطنیلر ، تبعه [Fonction-]

[naires, sujets, citoyens] . « قوه عامه » نک عامه نک منفعتی یولنده استعمال

ایدیله مه سی ملحوظ تهله کسنه قارشى تفتیش و نظارت اجرا ایدن بر هیئتک

موجودیتی : مبعوثان واعیان مجلسلری [Le parlement]

شو تعداد ایتدیکم وصفلردن بری مستثنا اولق اوزره دیکرلری دولته

تشکیلاته مظهر جماعتلر بیتنده مشترکدر . هر تشکیلاتلی جماعتک بر غایه سی، جماعتله اعضا بیتنده کی مناسبتی تعیین ایدن بر تعلیماتی، بر اداره هیئتی، برده عمومی هیئتی وارددر . فقط جبر اجراسی صلاحیتی آنجاق دولته مخصوص ومنحصرددر . جماعتلر تعلیماتلرینی تطبیق ایتدیرمک آرزو ایتدکلرنده دولتك وساطته مراجعت مجبوریتنده درلر . دولت ایسه بوتون اجتماعی غایه لری نفسنده جمع وترکیب ایتدیکی ایچون «ولایت عامه» یه مالکدر . شو ولایت عامه اوکا هیچ برما فوقک تدقیق، تنقید وتصدیقته محتاج ومعلق اولمق سزین امرلر اصدار ایده بیلیمک صلاحیتی بخش ایدهر که بوده سلطنتی تشکیل ایدهر .

اجتماعی فعالیتلرده هرکون توسع ایدن موقعی واصلی خطاری شو صورتله ارأه اولونان دولتك ماهیتی نهدر ؟ دولت بر جوهر می در [Substance]، بر مأموریت می در [Fonction]، یوقسه بروقه می در [Fait] ؟ دولت شخصییتی حائز می در ؟ دولت ولایت عامه نك ذی حق می در [Sujet de droit]، یوقسه ذی الیدی می در [Détenteur] ؟ حقوق عالی بر قیمتی حائز اولارق دولتن مقدم ودولتك فوقنده می در ؟ یوقسه دولتك سینه سنده می وجوده کلیر ؟ دولتی فعالیتلرک تأسس وتوسعنه سبب اولان مشترک غایه یی، دولتك غایه لرینی نه یولده تلقی ایتمه لی ؟ شوسؤاللر حقوق عامه علمنك أک معضل مسئله لرینی تشکیل ایدهر . بوخصوصلر ایچون اختیار ایدیله جک تلقیلره کوره قانونلرک وضع وتفسیرنده و تطبیقاتده اتخاذ اولونا جق تدبیرلر ده کیشه بیلیر . فقط شو مسئله لرک ایضاحنه کیرمه دن اولفرانسه انقلابیله برابر اساس قانونلره داخل اولان سلطنت نظریه سنی مبدأندن باشلا یارق قارئلره بیلدیرمک اقتضا ایدهر .

* *

اوروپا متمدن قوملرینك اکثر حقوقی موضوعه لرنده اولدینی کبی حاکمیتکده اساسی روما حقوقنده در . روماده ایسه حقوقی حاکمیت نظریه سی ایمپراطورلق دورینك مبادیسنده کورولیور .

جمهوریت دورنده حاکمیت کله سنك بوکون بزه اخطار ایتدیکی مختلف صلاحیتلر اهمیتلرینه کوره صیراسیله سانسورلر، قونسوللر، پره تورلر، تربونلر،

تهدیل کورولر [Edile curule] و کهستورلر [Questeur] طرفدن اجرا ایدیلیردی. بونلر مایسترا [Magistrats] عمومی نامی آلتده جمع اولونوردی. بونلری انتخاب وقانون وضع ایتک حقی ایسه سانتوری، تریبو و قونسولیوم پله بیس صورتلریله اجتماع ایدن روما و طنیلرینه عائد ایدی. [Assemblée par centuries, Assemblée par tribus, Concilium plebis] (۱) بونلرله برابر بالخاصه ایکنجی پون محاربه لرندن صوکر بر حکومت مرکزی حالی آلان «سنا»، روما اعیان مجلسی حاکمیتجه اهمیتلی وظیفه و صلاحیتلری حائز ایدی.

سانسورلر [Censeurs]: — روماده وطنیلرک اجتماعی موقعلرینی تعیین ایچون هریش سنه ده بر کره نفوس تحریری اجرا اولونوردی. بو وظیفه یی ایفا ایتک اوزره قونسوللک ایتیش اولانلر میانندن ایکی کیسه انتخاب ایدیلیردی. بونلره سانسور نامی ویریلشدی.

سانسورلرک حاکمیت نقطه نظرندن اک مهم وظیفه لری نوت آلمق [Notes] و انحلال ایدن اعیان اعضالرینک یرینه اُسکی مایسترالر میانندن لایق اولانلرینی تعیین ایتک ایدی.

حربده جانت کوستره ن، سیئات ایله مشتهر اولان، عائله سی اعضاسنه فنا معامله ایدن، دینی مراسم و تشریقاتی ایفا ایتمه ین بر کیسه سانسورک نوته معروض قالیردی. بونوت شخصک اعتبار و حیثیتی قیرار، اونی مدنی و سیاسی حقوقدن اسقاط ایدردی. سنانک اداره مرکزی اولماسنه نظراً اعضاسنی تعیین صلاحیتی ایسه سانسورک اقتدارینی آرتیرمشدی.

قونسوللر [Consuls]، پره تورلر [Préteurs] و دیگر مایسترالر: — قونسوللر لاتینجه امپریوم [Impérium] نامی ویریلن «حکومت اجرائیه» یی حائز ایدیلر. بو صلاحیت عسکرلرک تحشید و قومانداسی، «هیئت حاکمه» عقدیله حکم ویرمک، توقیف و حبس ایتک و وطنیلری اجتماعه دعوت ایله اونلره ریاست وقانون

(۱) فی الحقیقه روماده [Assemblée par curie] نامیله بر نوع اجتماع داها موجود ایسه ده بو کیتدکجه دینی مراسم اجراسنه انحصار ایتدیکی ایچون حاکمیتک حقوقی اساسلرینی تحری ایدرکن امال اولونابیلر.

تكليف ايله مك اقتدارلارنى تضمن ايله يوردى. فقط و طنىلرى اجتماعه دعوت، عسكره قوماند او عدالت توزيى صلاحيتلارنده پره تورلرده حائز اقتدار ايدى. يالكز قونسوللارك اقتدارلرى داها يوكسك [Impérium majus]، پره تورلر ككى ايسه اونك دوننده [Impérium minus] ايدى. شواساسه بناء قونسول پره تورى توقيف وجبس ايتمك صلاحيتنى حائز ايدى.

تريبونلر ايسه پله بلك [Plèbe] ريسلرى ايدىلر. بر پله ب حتى بر قونسول طرقدن توقيف ايدىلك ايچون تعقيب اولوندىغنده تريبون مداخله ايدىدرك ووه تو [Veto] دىردى. بووه توهر شىئى توقف ايتدىرمك ايچين كافى ايدى. تريبونلرك شخصى ديناً مقدس عد اولونوردى. اونلره قارشى جزئى بر تجاوز مقدساتك تحقىرى كىي تلقى اولونارق متعرض اعدام وماللىرى مصادره ايدىلىردى. ياواش ياواش تريبونلر خلقى عمومى ميدانلرده اجتماعه دعوت ايتمك، اوكا بعضى قرارلر اتخاذا ايتدىرمك صلاحيتنى احراز ايتدىلر؛ صوكرادن بو قرارلر قانون حكم وقوتى ا كتساب ايتدى.

چارشى، بازار وسوقا قلرده ضابطه وظيفهسى ئه دىللره [Ediles]، عمومى خزينه نك محافظهسى، عمومى محاسبه نك ادارهسى جرملرك جزالاندىرىلماسى ايسه كهستورلره [Questeurs] عا ئددى. روماده مائىسترالرك اهميتى پك بويوك ايدى. حتى پاتريسىه نلرله پله بئيه نلر بىننده كى تفاوتك زوالندن صوكر ا بر مائىسترالق اصالتى تأسس ايتدى.

مائىسترالرى اتخاب وقانون وضعى صلاحيتى اهالى يه عا ئد ايدى. و طنىلرك مختلف صورتلرده اجتماع و انعقاد يله حاصل اولان هيئتله قوميس [Comice] نامى ويرىلىردى. حاكىتك اك مهم تظاهراتى اولان مأمور تعيينى - اتخاب - و عمومى، مجرد قرارلر اتخاذا - قانون وضعى - صلاحيتلرينه مالك اوچ نوع قوميس كورويورز؛ هر هانكى بر قانون لايحهسى بو قوميسلردن هر هانكى برينه تكليف اولونا بىلىر. بونلر مشترك صلاحيته مالكدرلر [۱]. يالكز

[۱] قوميسلرك اسملىرى بوبىشك مبدأنده تعداد ايدىلىشىدى. بونلرك تشكىلات و تركباتى، چالاشما طرزىنى، بونلرى بر برينه ياقلاشدىرارق صلاحيت اشتراكى وجوده

قونسلیوم پلہ بیس [Concilium plébis] ده قانون تکلیفی انجاق تریبونه عائد ایدی و قبول اولونان لایحه لر [Plébiscite] نامیله تماماً قانون حکم و قوتی حائز دی . حالبوکه اجتماعه یالکز پلہ بلر دعوت ایدیلردی .

اعیان مجلسی [Sénat] — روما اعیان مجلسی اصلاً بر « شورای دولت » ماهیتی حائزدر . قرالر اونکله استشاره ایدہ لرلردی . سہ نانک قرارلری بونلری تقید ایتمز ، آنجاق تنویر ایلردی . فقط جمهوریت دورنده دولت اداره سی سہ نانک آلہ کچدی . بوایسہ اعیانک نصب و تعیینندہ کی طرز ایلہ وظیفہ لرندہ وقوعه کلن تبدلک نتیجہ سیدر . اعیانی اُسکی مائریسترالر میانندن انتخاب ایلہ تعیین صلاحیتی سانسورلرہ عائد ایدی . بو خصوصده سانسورلر سربست ده کلدی . بر کرہ اعیانک انتخابی کیتدکجه آزالان انحلال وقوعه متوقفدی . ثانیاً قانونی نامزد اولان مائریسترالرک عددی ایسہ دائماً چوغالما حالندہ ایدی . بونلر میانندن اک زیادہ تمیز ایدہ نی ، وطنه نافع خدمت لر عرضیلہ شهرت قازانانی تعیین اولونوردی . حالبوکه مائریسترالر عموماً اهالی طرفندن انتخاب ایدیلکده ایدی . بو صورتلہ سہ نابر منتخب هیئت حالی آلمش ، مملکتک اداره سندہ استناد ایتدیکی اساس صاغلاملاشمشدی . بوسایہ ده بالخاصہ ایکنجی پون محاربہ لرندن صوکر احکومتک حقیقی مرکزی اولدی . داخلی اداره ایچون مائریسترالر اتخاذ ایتدکلری اک مهم تدبیرلری ، اهالی یه تکلیف ایدہ جکلری قانون لایحه لرینی ابتداء سہ نایہ عرض ایدہ لرلردی . سہ نا ویرکیلرک ناضل صرف اولونا جغنی تعیین ایدہ ر ، سانسورلرک ، قونسوللرک ، پرہ تورلرک یایدقلری نافع امورہ رخصت ویریر ، که ستورلرک تأدیہ لرینی ویزہ ایدہ ردی . جنراللرک حرکت منطقه لرینی تحدید ایدہ ن ، اونلرک معیتلرینہ عسکرلری ویرہ ن ، ارزاق و مهماتی تدارک ایدہ ن سہ نا ایدی .

کثیرہ ن حادثہ لری ، تشریع اصولنک رومادہ اراثہ ایتدیکی تکاملی کورمک ایستہ یں ذاتلر آتیدہ توصیه ایتدیکن کتابی مطالعہ بویورسونلر . بز بورادہ روما حقوق عامہ سنی تفصیل ایتک ایستہ مہ یورز ؛ یالکز رومادہ حاکمیتک تعقیب ایتدیکی صفحہ لری پک مختصر صورندہ کوسترہ رک آتیدہ کی سوزلر مری کوزہ ل تلقی ایچون ذہنلری حاضر لایورز . توصیه ایتک ایستہ دیکمز اثر . Girard: Droit romain. Livre premier- Chapitre II. La république

خارجي مناسباتك اداره سې ، حرب اعلاني ، صلح عقدې ، ضبط اولونان اراضينك تشكيلا تي يامق تماماً اعيان مجلسنه عائد ايدې .

حتي مجبر حالر بهانه سيله و خصوصي قرار لرله تشريع نقطه نظر ندن اها لينك حقوقي بيله آله ايتمش ايدې [۱] . روما جمهوريت دورينه عائد اولارق اعطا ايتديكم شو تفصيلات دن آكلا شيلاجني اوزره تشريع حق ايله حكومت اجرائيه [Impérium] بر بر ندن آيريلشدي . نه مپرييوم ايسه متعدد آلره توديع ايديله رك صلاحيت رك [Compétence] بر برني تقيدي اصولي احداث ايديلشدي . يالكز ديقتاتوره لزوم كورولن زمانلرده بواصول اخلال اولونيوردي . ديقتاتورلك موقتاً « يد واحد » اصولنك اعاده سني تضمن ايدنيور وقانوناً تجويز ايديليوردي . ديقتاتورك صلاحيته قارشى بر حد و قيد قونولماشدي . اونك آنجاق آلتى آي ايچون تعين اولونا بيلمه سي يكانه قيد ايدې . فقط سه زاركې انقلابي قوتلر بوزماناً اولان تقيدي ده رفع ايتدي . او كوست فوق العاده صلاحيتلر ندن فراغت ايتديكني ناطق اولارق يازديغي سياسي و صيتنامه سنده دولتي كندى حاكيتدن چيقارارق سه نايله ملتك حاكيتته وضع ايتديكني بيان ايدينيوردي . يالكز شو حادثه يه نظر ايديلير سه روما ايمپراطور لغنده جمهوريت دور ندن داها منتظم بر « حكومت انام » تأسس ايدى چكي ظن اولونور . فقط وقوعات عكسني اثبات ايدنيور . مع مافيه او كوستك تأسيس ايتديكي حكومت بيزانس حقوقنجه اعتراف اولونان استبداد ده كلدر . ديوقله سيهن [Dioclétien] ايله قوسطانطينك « يد واحد » اصولنه قارشى بودورده صلاحيت رك ايمپراطور ايله سه نا پيننده تفريق اولونماسنه اثنييت [Dyarchie] نامي و يريلدي . بونكه برابر فعلياتده ، حتي حقوقاً ايمپراطور ، او كوست دور ندن اعتباراً بر تفوقه مالك بولونيور ؛

[۱] وصيت ، تبنى كې خصوصلر روماده عائله حقنده اولان وعمومى انتظامه [Ordre public] تعلق ايدى عمومى قانونلرك اخلالى شكنده تلقى اولونوردي . بونك ايچون هر حالده رهبان رئيسلري ايله [Pontife] اها لينك مداخله سنه لزوم كورولوردي . بوضورتله بونلر اها ليه عائداولان تشريعي حقوق دن اولديني ايچون سه نانك بومسئله لري بنمسه مه سي تشريع حقنه تجاوز دن باشقا برشي ده كلدي . Mommsen: Droit public romain, t; 7. p, 457

بو تفوق اولاً آردین [Hardien] صوکر اسه وەرلر [Les Sévères] زمانده تزايد و توسع ایدیور.

قومیسر انتخاب صلاحیتته اوکوست دورنده مالک ایدیلر . فقط تیهرک [Tibère] حکومتک برنجی سنه سنده انتخاب سه نانک وظیفه لری عدادینه ادخال ایدیلهرک اهلیدن نزع اولوندی . قومیسرک قانون وضعی صلاحیتی ايسه اوزون مدت دوام ایدمه دی . قلود [Claude] دورنده برقاچ قومیس قانونی [Lois comitiale] کورواه بیلور . نه روا [Nerva] زمانده کی یکانه قومیس قانونی ايسه بوتشریع طرزینک صوک محصولیدر . قومیسرک انتخاب و تشریع خصوصارنده کی بوتون فعالیتلری بر مسئلهیه انحصار ایتشدی . اوده : ایمپراطورک جلوسنده تریبونلرک و مایسترالرک صلاحیتلرینی ایمپراطوره تودیع ایتک تکلیفی ناطق اولان سه نا قرارینی [Sénatus-consulte] آلقیشلره قبول ایتک . سه نا ايسه قومیسرک انتخاب و بر درجهیه قدر تشریع صلاحیتلرینه مالک اولمشدی . قضا وظیفه سی ايسه ایمپراطورله سه نا بیننده مشترکدر . بوندن باشقا سه نا ولایتلرینک [۱] ویرکیلری ایمپراطورک خزینه سندن آیری اولارق عمومی خزینه یه عائد ایدی . ایشه سه نانک شو صلاحیتلری بودوره [Dyarchie] نامی ویریله سنه سبب اولدی . فقط شو ایکی قدرتدن بری ، ایمپراطور ، مایسترالرک برنجیسی اولمقاه قالمادی ، صلاحیتلری کیتدکجه متزاید و اک قوتلی بر مایسترا اولدی . جمهوریتک مختلف ألله تسلیم ایتدیکی اقتدارلر برنجی مایسترانک ، ایمپراطورک ید واحدنده تمرکز ایدیوردی . مع مافیه بدایه ایمپراطورک حاکمیتی ایکی حقوقی اساسه استناد ایدر . بر کره ایمپراطور مایسترا ، بناءً علیه قونسول اولدینی ایچون جمهوریت زمانده قونسوللرک حائر اولدقلری صلاحیتلری اجرا ایدیور ؛ یالکز قونسول بر سنه ایچون منتخب ایکن ایمپراطور تمديد اصولجه [Système de prorogation] غیرمعین

[۱] روما ولایتلری اداره نقطه نظرندن ایکی یه آیریلشدی . بر قسمی ایمپراطورک مخصوص مأمورلری طرفندن اداره اولونوردی که بونلرک وارداتی « خزینه خاصه » یی تشکیل ایدوردی . دیگر قسمی سه نانک اداره سنده اولان ولایتلردی که مات خزینه سنی بونلرک وارداتی وجوده کتیرردی .

بر وقت ایچون بو صفتہ مالکدر . بوکا [Impérium proconsulaire] دینیر . ایمپراطور بو اقتداری سه نا ایله اوردودن آلدی .

ثانیاً ایمپراطور پلهب موضوعه لرینک وجوده کتیردیکی تربیونلرک حقوقی وسائر بوکا متفرع صلاحیتلری اجرا ایدر . بوده جلوس زماننده سه نانک تکلیف واهالینک آلقیشلرله قبول ایتدیکی برقانونه مستددر [Lex regia] . بوکا [Potestas = puissance tribunitienne] دینیردی . بونلرایمپراطورک حاکمیتی تأمین ایدن ایکی لازم وکافی استناد نقطه سیدر . برنجیسنه بناء بوتون اوردویه قوماندا و منصبلری توجیه ایله مملکتلری اداره ایتک صلاحیتی حائزدر . ایکنجیسنه بناء ایمپراطورک شخصی مقدسدر ؛ اوکا وقوع بولاجق تجاوز بوتون رومالیرک عظمت و شوکته قارشی بر تعرض تشکیل ایدر که جزاسی اعدامدر [Crime de lèse-majesté] .

خارجی مناسبتلرک اداره سی ، صلح عقدی ، حرب اعلانی و قضا اجراسندهده صوک سوزی سویله مک ایمپراطورک امپریومنه متفرع حقلردندر . بونلردن باشقا باش راهب صفتیله دینی اموری اداره ایدن ، سانسورلک وظیفه سنه بناء سه ناتورلرک ، شووالیه لرک ، وطنیلرک ایسته سنی ترتیب ایله اونلرک اجتماعی موقعلرینی تعیین ایله ین ایمپراطوردر . ایشته بو صورتله ایمپراطور بدایتده روما قومنک وکالته بناء بوتون اقتدارلری ، صلاحیتلری آنده جمع ایتدی .

فقط اشیاده موجود اولان طبیعی تکامل ایله قومک وکالتی یرینه ایمپراطورلق صفتی قائم اولدی . آرتق بوندن بویله ایمپراطورک حاکمیتی قومه وکالة اجرا ایدیلن برحق ده کلدر . اوایمپراطورک شخصنه عائددر . تکامل اوچنچی عصرده دیوقله سیهن وقونسطانطین ایله ختام بولویور . ایمپراطورک اراده سی قانونی تولید ایدیور . قانونه اطاعت لازمدر . چونکه ایمپراطورک اراده سنی [Volonté] ترجمه وافاده ایدیور . بواراده ایسه حاکمیته کنیدیسی مالک اولدیغندن تبعه نک اراده لری [Volonté] فوقده ، بناء علیه اونلر ایچون رعایت اولونماسی مجبوریدر . وایمپراطورک اراده سی کندیلکندن امری تضمن [Impératif]

ایتدیکندن مقاومتسز انقیادی استلزام ایدهر. وقوع بولاجق هر نوع مقاومت جبری قوت ایله [Par contrainte] ازیله لیدر.

ایشته روما دهاسنک حاکمیت حقنده خلفره ترك ایتدیکی حقوقی نظریه بوندن عبارتدر.

حاکمیتک شو تلقیسی « قرون وسطا » ده انخساف ایدیور. غربی روما ایمپراطورلغی باربارلرک صدمه سی آلتنده اضمحلاله دوچار اولمشدی. شارلمان حکومتی ایسه حیاتنک افولیه برابر انحلال ایتدی. اوروپا جمعیتده دره بکلك میدان آلدی. دره بکلك ذاتنده مقاوله اوزرینه مؤسسدر. جمعیتک تشکیلاتنده مقاوله نك موجودیتی حاکمیتک معدومیتنی افاده ایدهر. چونکه حاکمیت اداره ایتدیکی مناسباتده مافوق، رقیب ویا مساوی طایماز. اوجعیتده اُک یوکساک براراده در [Volonté]. مقاوله ایسه ایکی طرف ایچون حقلر ووظیفه لر تولید ایدهر وایکی طرف اراده سنک مساواتی متضمندر. بناءً علیه « قرون وسطا » ده حاکمیتک انخسافی دره بکلك ظهورینه سبب اولدی. بوصورتله « قرون وسطا » نك مختلف اجتماعی صنفلری متقابل حقلر ووظیفه لر تولید ایدهن مقاوله لرله بربرلرینه باعلامشدر و برمراتبه وجوده کتیرمشلردی. فی الحقیقه دره بکی امپریومنه [Imperium] مستنداً امرایدهن برپره نس ده کلدر. او وعد ایتدیکی خدمتله مقابل وعد اولونان خدمتلك اجراسنی ایسته ین بر عاقددر. زمانک متلرنده نه امپریوم کله سنه تضادف بیله اولونامایور. بالعکس قوی ایله ضعیفی متقابل حق ووظیفه لره مستنداً بربرینه ربط ایدهن وفاق [La concordia] کله سی چوق مستعملدر. وفاق، « قرون وسطا » یی دولدوران مجادله لره، چارپیشمالره، شدتله رغماً اجتماعی بنیه نك اساسیدر. مع مافیه حاکمیت تماماً زوال بولامش، یالکز منخسف اولمشدی. هیچ برمافوقه صداقت واطاعت وعد ایتمه ین دره بکی حاکمیته مالک ایدی. آلمانیا ده ایمپراطور، فرانسه ده قرال کیسه یه [۱] قارشى مقید ده کلردی. چونکه

[۱] Aux empereurs du Saint empire qui veulent réduire les rois à n'être que leurs feudataires, un jurisconsulte du 16ème siècle répond que tous les princes de la terre sont soumis à l'empereur, hormis le roi de France, d'où cette formule, « le roi est empereur dans son royaume. »

قرال تاجى ايچون كيمسه يه صداقت و اطاعت و عدايمه مشدى . اوتاجنى جناب حق ايله قيليجه مديون ايدى . [Seul le roi de France tient sa couronne de Dieu et de son épée] [Le grand justicier] اولارق طائمشدى . حتى قاپه سين حكومتك اُك ضعيف زمانلرنده بيله خلق قرالى عدالتله صلح تامين ايتك صلاحيته مالك بيلرلردى .

ايشته شو صلاحيت ، عدالتله صاح تامين ايتك وظيفه و صلاحيتى او وقتك حقوقچيلرى اُنده حاكميتى ، روما حقوقى خاطرله ريله دره بلكك موضوعه لرينى مزج ايدى رك ، قرال نفعنه احيا ايتك ايچون اُنى براساس اولدى . حقوقچيلر قرالك حاكميتى روما حقوقنده كى ملكيت حتى اساسنه كوره انشا ايتديلر .

شخصى ملكيت .. بو ، اشيا اوزررنده احراز ايتديكمز حقلرك اُك يوكسك درجه سى ، اُك واسعى و اُك قديمدر . بو ، برشخصك مادي برشى اوزررنده كى استبداد و انحصار طريقيله حقيدر . مجله نك « ۱۱۹۲ » نجى ماده سنده : « هر كس ملكنده كيف مائشاء تصرف ايدى . » ديدىكى بو حقدرد . بوكا روما ليردومينيوم [Dominium] ديرلردى كه [Domination] حاكميت افاده ايدى .

ايشته حقوقچيلر قرالك حاكميتى [Imperium] شو شخصى ملكيت حتى [Dominium] اوزرينه قوپيه ايتديلر . قرال شخصاً حاكميتك صاحبي و ذى حقيدر . حاكميت اونك ملكيدر . مالك ملكنده ناصل كيف مائشاء تصرف ايدى رسه قرالك حاكميتى ده اويله مطلق و كيف مائشاء بر حقدرد . اوزون مدت حكمنى سورهن و ملكى دولت [۱] [Etat patrimonial] نامى و يريلن تلقينك اساسى بودر .

[۱] غرب مدنى حقوقنه كوره [Patrimoine] تعبيرينك بوكونكى افاده سى تماماً اقتصادى برمعنادر : بو ، برشخصك خارجى عالمه قارشى حائز اولدينى اقتصادى صلاحيتدر : بناءً عليه پاتريمون آن تعبيريله يالكز مالك اولديغمز اموال و املاك آ كلاشيلما ماليدر . [Le patrimoine est le Pouvoir économique d'une personne envers le monde extérieur] Répétitions écrites sur le droit civile (l'année 1909-10) par M. Ambroise Colin.

حال بوكه وقتيله يالكز انسانك مالك اولدينى اشيا آ كلاشيليردى .

حاکمیتک شو صورتده تشکله باشلیجه ایکی سبب یاردیم ایتدی :

بر طرفدن قرالک اطرافنده طویلانان حقوقچیلر روما حقوقنده واسع معلوماته مالک ایدیلر . قرال حاکمیتده حقوقی برتمل قویمق ایچون یتیشدیریلن بوحقوقچیلر أفندیلرینک آرزولرینی ، روما حقوق عالمترینک شخصی ملکیتده ویردکلی اساسی حاکمیتده حقوقی تمیل یاپارق اُک کوزهل صورتده اسعاف ایده بیله . جکلرینه قانع اولدیلر .

دیگر طرفدن دره بکلک حقوقی اراضی تصرفی ایله اقتدار صاحبی اولمق آراسنده صیقی بر رابطه تأسیس ایتشدی . اقتدار [Pouvoir] آنجاق اراضی متصرفی اولانه منحصر واراضینک تصرفی اقتدار متضمندر . فی الحقیقه دره بکلک اُک قوتلی دورنده بیله قراله اراضییه تصرف رابطه سندن آزاده برحق ، عدالتله صلح تأمین ایتمک حق طانییور ؛ او قرالیت داخلنده اُک بویوک حاکمدر [Le grand justicier] . فقط دره بکلک تلقیلری ، اراضی تصرفی ایله اقتداره مالکیت بیننده کی رابطه قفالره او قدر یرلشمشدر که قرال حاکمیتک حقوقی ماهیتی اوزرینه تأثیرینی حس ایتدیرمه مه سی امکانسزدر . بونک ایچون قرالک حاکمیتی هرشیدن اول بر سوزره نلک حق [Droit de suzeraineté] ، بناءً علیه بر ملکیت حقیدر .

شیمدی سزدره بکلک موضوعه لریله رومالیلرک شخصی ملکیت حقنده کی فکرلرینی مزج ایدیکز ، او وقتک حاکمیت حقنده کی اصولی تماماً کوزیکز اوکنه کتیرمش اولورسکز :

قوماندا ایتمک ، أمر ویرمک شخصی ملکیتده مشابه برحقدر . قرال شخصاً بوحقک مالک وصاحیدر . اُکر علم حقوقک بوکونکی اصطلاحلرینی استعمال ایتمک ایسته رسه ک « خاکمیت حقوق نفسیه دندر [droit subjectif] (۱) » ، قرال

(۱) بوکونکی اصطلاحه کوره [Droit objectifs] اصل قاعده حقوقیه در .

ایسه ذی‌حقدر [Sujet de droit]. قرالک شوقی سائر اموال و املاکی کی
معین بر وراثت اصولیه ارثاً انتقال ایدر. « دیمک لازم کلیر .
شو اقتدار ، قرالک ملکی برحق اولان شو حاکمیت اون آلتنجی عصر دن
بری غربده سلطنت [Souveraineté] نامی آلدی .

بدایهٔ سلطنت [Souveraineté] قرال حاکمیتک عینی افاده‌ایدن بر مفهوم
ده‌کلدی . او ، بعضی دره بکلک‌لرک [Seigneurie] ، بالخاصه قراله عائد دره
بکلکک خصوصی بر ممیزه‌سی [Caractère particulier] ایدی . دیگر بر دره
بکنه تابع اولمایان ، داها دوغروسی بکلکنی آنجا جناب حقه مدیون اولان
بکلرک حاکمیتنه مخصوص بر ممیزه ایدی . بارون بارونلغک داخلی ایشلرنجه
دیگر برینه تابع ده‌کلدر . بناءً علیه بارونک بارونلغی داخلنده کی حاکمیتی سلطنت دره .
فقط سلطنت ممیزه‌سی بالخاصه قراله عائد دره . قرال قرالیتک عمومی محافظه‌سنه
مالکدر .

بوصورتله اون آلتنجی عصرک صوک نصفنده سلطنت منحصرأ قرالک حاکمیتی
افاده‌ایدن بر تعبیر اولدی . کله‌بی ابتدا بومعناده قوللانان بوده‌ن [Bodin] دره .
بوده‌نه کوره سلطنت : بر جمهوریتک مؤبد و مطلق حاکمیتدر . بوده‌ن
سلطنتی یالکز تعریف ایله اکتفا ایتهدی . اونی برده تحلیل ایتدی . بوتحلیله
اساسی نشانه اولق اوزره بوده‌ن دیورکه « سلطنت بر مافوقک و یا مساوینک
و یا مادونک رضاسنه محتاج اولمقسزین عامه‌یه عمومیت اوزره وهر برینه آیریجه [۲]
قانونلر ویرمکدر . سلطنتک دیگر خاصه‌لری ایسه صلح عقد ، حرب اعلان
ایتمک ، درجهٔ نه‌ایده حکم ویرمک ، مأموریتلر احداث ایتمک ، عفو حقنه

[Règles de droit] قانونی متلر و یا عادات ایله مجرد بر شکل اکتساب ایدن
قاعده‌لر دره . شخصلرک بوقاعده‌لره بناءً حائز اولدقلری اقتدارلرایسه [Droit subjectif] دره .
شوایکی اصطلاح بوکون علم حقوقده اقامت حق قازانمشلر سه‌ده مؤلفلرک تلقیلرینک طرز لری
آراسنده الاکن اختلاف موجود دره . بونی صیراسی کلدیکنده تفصیلاً عرض ایده‌جکم .
شیمدیلک بیان ایتدیکم درجه‌سی بیلینمک الزمدر .

[۲] بوراده مؤلفک مقصدی علمک بوکونکی اصطلاحلرینه کوره - [Actes -
administratif] « اداری عقدلر » نامی ویریلن فردی [Individuel] قرارلر دره .

مالك اولمقدر . « بو زمانه قدر سلطنتک مفادی معین ده کل ایدی . «بودن» دن صوکر ا تعین اتمکه باشلادی .

بو وجهله اون یدنجی ، اون سکزنجی عصرده بو مجرای تعقیباً سلطنت نظریه‌سی توسع و تکامل ایتدی . « ۱۶۴۲ » ده لوبره [Lebret] سلطنت حقیقه شو نتیجه‌ی ویریور : قرالیده سلطنت کونشده ضیا کییدر ؛ یعنی انفکاک قبول ایتمز . بو قرالک شخصه عاڈ بر ملکیتدر ، اونک واسطه‌سیله بوتون قرالته انتشار ایدر .

شیمدی فرانسه انقلابندن اولکی سلطنت نظریه‌سی خلاصه ایدر سهك شو دستوری آله ایتمز اولورز :

سلطنت بر ملکیتدر ، وحدتله متصفدر ، انقسام قبول ایتمز ، فراغ اولوناماز . هر ملکیت کی بوده مطلقدر . بو حق مطلقک صاحبی قرالک شخصیدر و سلطنتک آک زیاده کوزه چارپان تظاهرلری قانونلردر که قرالک اراده‌سی افاده ایدر لر . اون سکزنجی عصرک نهایتنده بو وجهله سلطنت نظریه‌سی تماماً تأسس ایتمشدی . فرانسه انقلابی بونی اصلاً تغییر ایتهدی ؛ اولدینگی کی قبول ایتدی . انقلابی اصل وجوده کتیره نلر یالکز سلطنت حقنک صاحبنی ده کیشدیر مکله اکتفا ایتدیلر . سلطنت آنجا قوراله عاڈ ایدی . اونی قرالدن تزع ایله ملته ویردیلر . بوندن بویله سلطنتک صاحبی ملتدر . فقط حادثه یالکز بوندن عبارت می ایدی ؟ خایر . بونک ضمتنده بشریت تاریخنده برنجی دفعه وقوعه کلن عظیم بر انقلاب مندجدی . فی الحقیقه سلطنت قرالک ملکی ایدی . فقط اصل سلطنت قوتنک نشیمنی سما ایدی .

انقلابه قادار قرالرتاج و سلطنتلرینی سایه مدیون ایدیلر . بناءً علیه سلطنت قوتی علینده موقع اخذ ایدیوردی . انقلاب اونی سمان زمینه ایندیردی . بونکله برابر او وقته قادار سماوی اولارق جهانی اداره ایدن برشیئی زمینه تنزیله تهلکه یوقی ایدی ؟ بوپک جسورانه بر حرکت ده کلی ایدی ؟ بوکا قارشى اتحاد اولونا حق تدبیر ایچون اون سکزنجی عصر فلسفه‌سی قفالری حاضر لامشدی . بوتون حقوقچیلر اتفاق آرا ایله قرار ویردیلر : ممانن ایندیریلن سلطنتک

صاحبی انسان اولمایا جق . اوکا مخصوص اولمق اوزره حقوقی بر شخص وجوده کتیر دیلر . بوشخص لایموتدر و شر ایشله مکدن منزهدر . تشکیلاته مظهر هر ملتک حقوقی تشخصی بولایموت ، شردن منزیه ، ابدی شخصی وجوده کتیریر . ایشته بوده دولتدر [Etat] . سماندن ایندیر یان سلطنت بویله ، « مابعد الطبیعیات » ک اسرارلی توللریله ستر ایدیلد کدن صو کرا حکمرانلق اجرا ایله مکده در .

حقوق ، اراده یی تضمن ایدر ، اراده [Volonté] اولمایان یرده حقوق ده بولوناماز . اراده ایسه شخصلره مخصوصدر . دولت شخصیته حائز اولدیغندن اراده یه مالکدر . ایشته سلطنت بر حقوقی شخص اولان دولتک اراده سی ، داهادوغروسی بواراده نک اقتدار ایدر : [Eelle est le pouvoir de la volonté de l'Etat] . اراده نک اقتدارلری ایسه حقوق نفسیه [Droit subjectif] یی تشکیل ایدر . بناء علیه سلطنت دولتک حقوق نفسیه سنددر . دولت ، سلطنتک مالک و ذی حقیدر .

فقط حقوق نفسیه فردلرده دخی موجوددر . بو وجهله مثلاً بر مالک ، موضوع قانونلرک تعیین ایتدیکی ملکیت حقى دائره سنده کندینه عائد مال ایچون اراده سنی دیگر اراده لره ضروری قبول ایتدیریر . دولتک اراده سی بوسورتله تظاهر ایتیز . او بر امری تضمن ایدر . او اراده نک هر نوع تجلیلرنده بر امریت خاصه سی (Impératif) لك مند مجدر ؛ بر امردر . امر ایدن اراده ایسه امر ایدیلنلرک اراده لرینه نظراً داهای عالی اولغنی مقتضیدر . بوسورتله دولتک اراده سی ملکی حدودی داخلنده بولونان [Obéissance passive] استلزام اراده لرک فوقنده در . بواراده ده کی شو علویت رتبه سی بر « مطاوع انقیاد » ی ایدر . اطاعت سزلك کوستره نلر حقنده محق اولارق مادی جبر [Contrainte matérielle] استعمال اولونور . دولت اراده سنک دیگر اراده لر فوقنده اولماسی حکمتی ایسه پک آشکاردر . چونکه دولت تشکیلاته مظهر ملتک حقوقی شخصیتیدر . بناء علیه دولتک اراده سی « کتله عامه » نک اراده سیندر .

شو مطالعه بزه سلطنتک دیگر بر خاصه سنی داهای کوستیریر . اوده دولتک

حرکت حدودىنى كىندىسى تەيىن ایتەسى صلاحیتیدر . سلطنت اصلی براراده [Volonté orginaire] در؛ مشتق براراده [Volonté dérivée] دەکلدر . دولت صلاحیتك دائرەسىنى كىندى تەيىن ایتك صلاحیتە مالکدر [Il a la compétence de la compétence] . ولایت، ناحیه کبی حقوقى شخص اولان جماعتلرک صلاحیت دائرەسىنى ایسه دولت تەيىن ایدەر . اولنرک ارادهلری دولتک اراده سندن مشتقدەر . وظیفه لرک تفریق دییه رک اساسی قانونلره مبتنی عدايتك اصلی براراده اولدیغی فکرىنى تولید ایدەر . اولنرک ارادهلری ساطتله تقابل ایتدیريله مر .

حاصلی امرلر اصدار ایدەرک کىندى حرکت حدودىنى كىندى تەيىن ایتەىن جماعت سلطنتە مالک دەکلدر . بر جماعت آنجا ق أمرلر اصدار ایدەجکی دائرەىنى كىندىسى تەيىن ایتکله ، بو خصوصە دیگر بر اراده نك تلقینتە ، اجبارینە معروض قالماقله سلطنتى حائز عد اولونور . دینه بیلیرکە سلطنت مثبت و منفی اولارق ایکی ممیزه یه مالکدر : مثبت ممیزه : سلطنت محضا اراده اولق حسیله أمر ایتك اقتداریدر . منفی ممیزه : سلطنت اصلا دیگر براراده طرفندن امر آلاماز . شوسرد اولونانلرک کافه سی نظر دقتە آ لینارق سلطنت شو وجهله تعریف اولونابیلیر :

سلطنت : کىندى اراده سندن غیری اراده لردن مستقل اولارق کىندیلکندن أمر ایتك اقتدارىنى حائز اولان دولت شخصنك اراده سیدر . سلطنت و دولت حقنە اعطا اولونان شوتفصیلات نتیجه لری اعتباريله پك زنکیندر :

سلطنت براراده در . اراده ایسه اصل و ماهیتی اقتضاسنجه وحدتله متصفدر؛ انقسام قبول ایتمز ؛ فراغ اولوناماز ؛ زمان مروريله اکتساب ایدیله مر . شو خاصه لرک کافه سی سلطنتە دخى موجوددر . بونی ۱۷۸۹ حقوق بشر بیاننامە سیله ۱۷۹۱ قانون اساسی صریحاً ذکر ایدیور [۱] .

[1] Déclaration des droits, art, 3; cont. 1791, tit, III, art, 1.

دولت، ملتک حقوقی تشخیصیدر، « کتله عامه » نك شخصیتیدر؛ بناءً علیه سلطنت دائماً عامه نك نفی یولنده تطبیق واجرا اولونمالیدر. دیگر طرفدن دولت لایموت عد اولونور، ایدیدر.

بناءً علیه اونک حقوقی موجودیتی انقطاع قبول ایتمز. حکومت شکلی نه اولورسه اولسون عقد اولونان معاهده لر بو شکلک ده کیشمه سیله حکمدن سقوط ایتمز. برزمانده اعلان ایدیلن قانونلر رسماً فسخ ایدیلهدجه ویا یکی قانونلر وضع اولونمادجه مرعی و معتبردر. عقد اولونان استقراضلر و مقاوله لر مجبوریتلرینی محافظه ایدهلر.

کورولورکه دولت حائز اولدیغی سلطنت حسبیه حقوقاً فوق العاده اقتدارلره مالکدر. شیمدی سز بواقتمدارلری تحدید ایچون انسانلرک طبیعی و غیر مندرس حقوقی قانون واضعی طرفدن کچله مز برحد اوله رق تصور ایدیکز، فرانسه انقلابی یاپانلر طرفدن وجوده کتیریلن حقوقی منظومه نك هیئت مجموعه سنی کورمش اولورسکز.

۱۷۹۱ قانون اساسیسی بونی صریح صورتده سویله یور: « انسانک طبیعی حقوقه تجاوزی ناطق قانون یا یمق قانون واضعه منع ایدلمشدر [Titre I] » ایشه بوکون حقوق عامه علمیه متوغل اولانلرجه قلاسیق تعبیر ایدیلن مکتبک نظریه لرینک اساسلری شو عرض ایتدکلرمدن عبارتدر: دولتک وارانی، دولتک شخصیتی، سلطنت، انسانک طبیعی و غیر مندرس حقوقی.

برمدتن بری حقوق عامه علمنده بربحران حکم ایتکده در. شو اساسلر اجتماعی وقعه لری حقیه تفسیر و در آغوش ایدمه یورلر. حالبوکه بر حقوقچینک وظیفه سی وقوماتله تألیف قبول ایتمین قاعده لری آتمق، اونک یرینه اجتماعی محیطدن مقتبس یکی اساسلر اقامه ایتکدر.

بوکون کوزلر مز اوکنده جریان ایدهن انکاری امکانشز برحقیقت وار. اوده دولتک براستحاله دورنده اولماسیدر. وقتیله دولت ساده جه محارب، دیپلومات، قانون واضعی ایدی. بوکون ایسه دولت متزاید بر شوقله صنعتکار،

تاجر اولق یولنده در . اقتصادیات بوتون دولت مشغلهلرینی بلع ایدہ جک کیی کورونمکده در . کوندن کونه دیگر مشغلهلر ایکنجی درجهیه اینیورلر . موجودیتلرینی محافظه ایدہ بیلیورلر سه اوده آنجاق اقتصادیاته معاون اولق صفتیه قائم .

عمومی میلان شوشکلی عرض ایدہ رکن فلسفه مثبتہ دن عمیق صورتده متأثر اولان دماغلر حقوق عامه ده موجود اساسلر حقنده شبهیه دوشدیلر . اولنر انقلابی یاپانلره اصلی حقیقتلر کیی کورونن اساسلرک علمی اولوب اولمادیغنی تدقیقه باشلادیلر . بونک اوزرینه تنقیدی برتبع یولی آچیلدی .

اعتراض ابتدا سلطنت حقنده واقع اولدی . چونکه دولتک اساسی میزه سی سلطنتدر . سلطنت ایسه هیچ برما فوق طانیاز . حالبوکه فعلیاتده دولترک فوقنده بر دولت اولاییله جکی کورولدی . ایشته آلمانیا ده حال بو مرکزده در . بر کره اتحاد ایتش دولتر وار . برده بودولترک فوقنده آلمانیا هیئت متحده سی دولتی وار . بو حالی سلطنت نظریه سی ایله ناصل تألیف ایتمه لی ؟ شو وقعہ سلطنتی اساسندن ده ویرمه یورمی ؟ بناءً علیه بعضی حقو قجیلر سلطنتک عدمنی ادعا ایتدیلر . بونکه برابر کیسه دولتک موجودیتنی وشخصیتنی انکاره متصدی اولامامشدی . فقط بور دو حقوق فاکولته سی معلملرندن موسیو له ئون دو کوی ۱۹۰۱ [۱] و ۱۹۰۳ [۲] ده نشر ایتدیکی ایکی اثر ایله بو ایکی اقنومک ده فعلیاتله تألیف قبول ایتمه دیکنی بیان ایتدی . مخرب تنقیدلریله اجتماعی آهنکی آلت اوست ایدہ جک هجوملرده بولوندی . کن دیسنک یکانه قصوری ییقدقلرینک یرینه یکی بر نظریه بنا ایدہ مه مه سیدر . ولایت عامه یه موسیو دو کوینک نظریه لرینه مبتنی بر حقوقی تمل ویریه مه دی . بونکه برابر موسیو دو کوی قطعاً مایوس اولمق سزین ۱۹۰۸ ده [Hautes études sociales] مکتبنده ویردیکی بر صیرا قونقه رانسرا ایله دولتک تولدیکنی ، ئوله مشسه بیله هان هان ئولمک اوزره بولوندیغنی اعلان ایتدی .

[1] L'Etat, le droit objectif et la loi positive

[2] L'Etat, les gouvernements et les agents.

قلاسیق مکتبك ایلرى كلنلرندن موسیو لارنود [Larnaude] ۱۹۱۰ دە پارس ده [Collège libre des sciences sociales] ده «حقوق عامه ده منہاج» اوزرینه ویردیكى بر قوتفهرانسه دولتك ئولمەدیكنی مبشرانه بیان ایتدی ، [Petit bonhomme vit encore] [۱] ودولتك اویله قولای قولای کندینی موته تسلیم ایتمەیه جگنی ده قناعتله علاوه ایتدی. دولت شخصیتنى پك قوی بر مدافعه قانادیه حفظ ایدەن متوفى موسیو «أسمهـن» ایدی . «حقوق اساسیه» نامندەكى مهم اثرینك بشنجی طبعندە موسیو دوکوینك نظریه لرنی تلخیص ایلە برر برز رد ایدیور .

فرانسه ده دولت شخصیتنى مدافعه ایدەنلردن بری ده غرونوبل حقوق فاکولته سی معلملرندن موسیو «میشو» در، موسیو «میشو» مغیری شخصیت اوزرینه یازدیغی اثرده موسیو دوکوینك و تلیذرینك نظریه لرنه قارشى عکس عمل یایمق زمانی حلول ایتدیكنی بیلدیریور .

آلمانیا ده ایسه موسیو «لابان» ایلە «په لینه ك» دولتك موجودیت وشخصیتنى آلمانیا ایمپراطورینك نفعنه اولارق بویوك بر «اوتوریتە» ونفوذ وبلاغتله مدافعه ایتمكده درلر .

بز قلاسیق مکتبك نظریه لرنك اساسنى اصلی چیزکیلریله قارئلره بیلدیرد کدن صوکرادولتك موجودیت وشخصیتك و سلطنتك بو کون اراة ایتدکلى صفحەلر وتلقیلری توالی ایدەجك مقاله لرمنزله عرض ایتمکه چالیشاجغز .

مصطفی شرف

«قونیه» حقوق فاکولته سی مدیری

— — — — —